



Inatsisartunut Ilaasortaq Hans Enoksen, Siumut  
Inatsisartut  
/MAANI

### **Sinerissamut qanittumi qaleralinniarneq pillugu § 37 2012-110-ikkut apequtigineqartumut akissut**

Inatsisartut suleriaasissaanni § 37, imm. 1 malillugu sinerissamut qanittumi qaleralinniarneq pillugu apequteqarsimavutit. Apeqqut uannut akisassanngortinneqarsimavoq.

10. maj 2012  
Sagsnr. 2012-065747  
Dok. Nr. 901768  
Postboks 269  
3900 Nuuk  
Tlf. (+299) 34 50 00  
Fax (+299) 34 63 55  
E-mail: apnn@nanoq.gl  
www.nanoq.gl

#### **Apeqqut:**

*“Matumuuna Naalakkersuisunut apequtiginiarpara sinerissami aalisariutit qaleralinniartut toqqaannartumik avammut niuernissaminnut qaqugu akuersissummik tunineqarniarnersut?”*

#### **Akissut:**

Sinerissamut qanittumi qaleralinniat aalisakkanik tunisassiatik akuersissutinik makkuninnga peqarunik toqqaannartumik nunanut allanut tuniniarsinnaavaat:

1. Angallammi tunisassiornissamut akuersissut. Aalisarneq pillugu Inatsisartut inatsisaat nr. 18, 31. oktober 1996-imeersumi § 12 malillugu Naalakkersuisut taamatut akuersissuteqarsinnaapput.
2. Angallammi tunisassiornissamut pisortanit akuerisaagunik. Fødevarestyrelsen Danmarkimiittoq taamatut akuersissuteqarsinnaavoq, taanna neqilerivinnik aalisakkerivinnillu taamatuttaaq angallatinik tunisassiortunik nunanut allanut niuernissaq siunertaralugu akuerisaasunik pisortatigoortumik akuersissuteqartartuugami nakkutilliisuullunilu.
3. Avammut tunisaqarsinnaanermut akuersissut. Inatsisartut peqqussutaat nr. 5, 22. november 1984-imeersoq kalaallit tunisassiaasa avammut nioqqutigineqartarnerat pillugu akuersissuteqartarnermut taamatullu Namminersornerullutik Oqartussat nalunaarutaat nr. 8, 8. februar 1985-imeersoq avammut tunisaqarsinnaanermut akuersissutinut tunngasoq malillugit Inuussutissarsiornermut Naalakkersuisoq avammut nioqquteqarnissamut akuersissuteqarsinnaavoq.

Sinerissamut qanittumi aalisariutini angallammi tunisassiornissamut akuersissuteqartarneq eqqarsaatigalugu taamaattoq ullumikkumut periaaserineqartarsimavoq aalisarneq pillugu inatsimmi § 12 malillugu angallatini taamaattuni angallammi tunisassiornissamut akuersissuteqartoqartarani. Angallatimmi taamaattut nunami aalisakkerivinnut tulaassisussaatitaapput. Taamaattoq Naalakkersuisut tamatuminnga ajornartorsiut aalisarnermik inatsisip iluarsaateqqinneqarneranut atatillugu suliarilersaarpaat,

aalisartut pitsaanerpaanik aningaasaqarnikkut atugassaqartitaanissaat  
qulakkeerniarlugu. Kisiannili nunami aalisakkerivinnut ataatsimullu isigalugu  
aalisartunut iluaqutaasussat ajoqutaasussallu nalilersorlugit  
misissorneqaqqaassapput.

Inussiarnersumik inuulluaqqusillunga

Ane Hansen